



Broj: 02-2-330/24
Datum: 05.07.2024.

**BOSNA I HERCEGOVINA
PREDSJEDNIŠTVO BiH**

N/r Dr. Denis Bećirović, Predsjedavajući Predsjedništva Bosne i Hercegovine

**BOSNA I HERCEGOVINA
MINISTARSTVO CIVILNIH POSLOVA BIH**

N/r: dr. Dubravka Bošnjak, ministrica

**BOSNA I HERCEGOVINA
FEDERACIJA BiH**

VLADA FBiH

N/r. gosp. Nermin Nikšić, premijer

FEDERALNO MINISTARSTVO OBRAZOVANJA I NAUKE

N/r. prof. dr. Jasna Duraković, ministrica

FEDERALNO MINISTARSTVO KULTURE I SPORTA

N/r. gđa. Sanja Vlasisavljević, ministrica

VLADA KANTONA SARAJEVO

N/r. gosp. Nihad Uk, premijer

KANTON SARAJEVO

MINISTARSTVO KULTURE I SPORTA KS

N/r. gosp. Kenan Magoda, ministar

KANTON SARAJEVO

MINISTARSTVO ZA NAUKU, VISOKO OBRAZOVANJE I MLADE

N/r. prof. dr. sc. Adna Mesihović, ministrica

Poštovani,

Dana 03.07.2024. godine održan je kolektivni sastanak uposlenika Nacionalne i univerzitetske biblioteke Bosne i Hercegovine. Povod sastanka je nepovoljno finansijsko stanje ove institucije zbog nedostatka finansijske podrške nadležnih organa za njen rad, što onemogućava normalno funkcionisanje. Ukoliko se finansijsko stanje NUBBiH ne riješi u doglednom periodu, radnici neće imati elementarne uslove za rad i NUBBiH će biti dovedena pred zatvaranje.

Referirajući se na historijski kontekst i prelomnu tačku za sudbinu NUBBiH, uposlenici su stava da ukoliko se HITNO ne poduzmu konkretni i odgovarajući koraci za rješavanje finansijskog stanja, **Nacionalna i univerzitetska biblioteka Bosne i Hercegovine će se zatvoriti 25. augusta 2024. godine, simbolično, istog dana kada je spaljena u zgradi Vijećnice 1992. godine**, kada je izgorjelo preko 2 miliona bibliotečkih jedinica, kada je spaljivan kontinuitet našeg historijskog postojanja, kada se barbarski brisala memorija jednog kolektivnog bića. Čak ni tada, u vrijeme ratnog beznađa, Nacionalna i univerzitetska biblioteka BiH nije bila formalno zatvorena. Da li će, danas, nakon 80 godina kontinuiranog rada i postojanja, Biblioteku, „u miru“, zatvoriti vlasti u državi Bosne i Hercegovine konačnom odlukom da se misija agresorskog uništenja Biblioteke „napokon“ dovede do kraja.

Stanje u Nacionalnoj i univerzitetskoj biblioteci Bosne i Hercegovine je kompleksno. Radnici nisu primili plate tri mjeseca (posljednju za mjesec mart), resursi za normalan i redovan rad su gotovo iscrpljeni, elementarna sredstva za funkcionisanje institucije su potrošena, opstojnost institucije koja se, između ostalog, temelji na radu s korisnicima i pružanju usluga akademskoj, naučnoj i široj zajednici, dovedena je u pitanje. Ukratko, NUBBiH, zbog neriješenog finansijskog statusa i nedovoljne podrške nadležnih organa u državi BiH (državni, federalni i kantonalni nivo), nema više raspoloživih sredstava, čime ova institucija neće biti u mogućnosti obnašati vlastitu ulogu u prihvatljivom kapacitetu.

Ali, problem nije samo finansijske naravi. Rezinirajuća činjenica za radnike NUBBiH jeste što se nadležni organi vlasti u BiH (državni, federalni i kantonalni nivo) oglašuju o sudbinu ove institucije, što država ne pokazuje odgovarajuću brigu, što ne postoji dovoljno nastojanja i angažmana da se iznađe rješenje ne samo za trenutno, već i ukupno stanje koje je neshvatljivo za instituciju koja je temelj državotvornosti i kulturno-historijskog identiteta države.

Iako je Skupština Kantona Sarajevo ove godine usvojila Zakon o privremenom sufinansiranju institucija kulture i obrazovanja čiji je osnivač Bosna i Hercegovina, na osnovu kojeg je obećano, ne potpuno, ali koliko-toliko prihvatljivo rješenje za sedam institucija kulture od značaja za BiH, ipak, u praksi, od ovog zakona NUBBiH nije, do sada, imala apsolutno nikakve koristi. Ministarstvo za nauku, visoko obrazovanje i mlade Kantona Sarajevo (MONKS) je NUBBiH-u dodijelilo 220.000,000 KM za 2024. godinu, što je približno isti iznos koje je NUBBiH dobila i prethodne, 2023. godine, dakle mnogo prije prijedloga i usvajanja pomenutog zakona (također, i ova sredstva su umanjena za skoro 200.000,000 u odnosu na

dobivena u 2022. godini). Naglašavamo da su sredstva MONKS dovoljna tek za dvije mjesečne plate uposlenika NUBBiH.

Pored toga, trenutnu situaciju usložnjava i to što Federalno ministarstvo obrazovanja i nauke još uvijek nije raspisalo Javni poziv o sufinansiranju programa i projekata institucija nauke i kulture od značaja za Bosnu i Hercegovinu. Iako značajna sredstva koje je obezbjeđivalo ovo ministarstvo, ona ipak nisu dovoljna niti trajna. Nažalost, nije raspisan ni odgovarajući javni poziv Ministarstva kulture i sporta FBiH, koji jeste značajna podrška našoj i drugim institucijama kulture u BiH, mada u **limitiranom iznosu**.


S obzirom da radnici NUBBiH ulaze u četvrti mjesec bez plate i odgovarajućih uslova za rad, tražimo/molimo od Vas hitan i konkretan angažman, u skladu sa nadležnostima, te jasniju i temeljitiju analizu cjelokupne situacije.

Uposlenici NUBBiH ne samo da mjesecima rade bez plate, već se narušava i njihovo profesionalno, ali i ljudsko dostojanstvo. Ponižavajuće je što nema odgovarajućeg konstruktivnog i dobronamjernog pokušaja iznalaženja optimalnog rješenja koje će uposlenicima NUBBiH dati vjeru da briga o državnom, kulturnom i intelektualnom blagu nije uzaludna. Uostalom, Specijalne zbirke NUBBiH su i nacionalni spomenik države BiH.

Stoga, ukoliko pitanje opstanka NUBBiH ne postane prioritarno i u hitnom roku ne stavi se u razmatranje, ovoj instituciji neće preostati ništa drugo nego da se, u nedostatku elementarnih uslova i podrške, zatvori. Naravno, mi ćemo učiniti sve, kao i do sada, što je u našoj moći da ne dođe do zatvaranja NUBBiH, a ukoliko stvari krenu u tom pravcu, obratićemo se i predstavnicima zvaničnih i meritornih međunarodnih institucija kako se ne bi ponovio slučaj zatvaranja još jedne prepoznatljive institucije kulture, obrazovanja i nauke u BiH, kao što je bio slučaj sa Zemaljskim muzejom BiH, prije nekoliko godina.

S poštovanjem,

Aldin Huskić
Predsjednik Vijeća uposlenika



Dr. Ismet Ovčina
Direktor NUBBiH

